



Er eitthvað betra til en að ganga á fjöll í
góðum félagsskap og fallegu veðri,
taka kaffistopp og kæla tærnar
í kaldri fjallatjörn?



Dagskrá Everest-hóps Útivistar árið 2016

Eftirfarandi er fyrirhuguð dagskrá Everest-hóps Útivistar fyrir árið 2016. Fararstjórar áskilja sér rétt til að breyta því leiðarvali á fjöllin sem lýst er hér á eftir, í samræmi við aðstæður hverju sinni. Göngur eru alltaf á laugardögum en þó gæti gerst að ganga yrði færð yfir á sunnudag ef veður er mjög slæmt á laugardag en spáð að það verði afgerandi betra á sunnudag. Sé veðurspá fyrir báða dagana slæm er hugsanlegt að göngu yrði frestað til næsta laugardags.

Kringum Kleifarvatn verður fyrsta ganga ársins 2016, laugardaginn 16. janúar

Þetta er láglendisganga og hækkun er því óveruleg. Vegalengdin er um það bil 14 km og gæti gangan tekið ca 5 tíma en það fer þó eftir færð, ef það er snjór tekur gangan lengri tíma. Skemmtileg ganga í fallegu umhverfi rétt við borgina og við lofum góðum félagsskap ☺

Febrúargangan verður 13. febrúar og er á Lambafell í Þrengslum

Þetta er eitt af þessum fjöllum sem koma verulega á óvart og þaðan er glæsilegt útsýni til allra átta. Við leggjum bílunum við litlu námuna sem er inn við Þrengslavegin og göngum meðfram fjallinu að Lambafellstagli, þar hefst uppgangan. Við höldum eftir fjallinu endilöngu á toppinn og þaðan aftur niður í bílana. Vegalengdin er um það bil 8 km og hækkun 250 m.

Við höldum okkur við Hellisheiðina í göngunni 12. mars

Hrómundartindur og Tindagil verða fyrir valinu í mars. Við gerum ekki ráð fyrir að það verði akfært lengra en að afleggjaranum að Ölkelduhálsi svo við leggjum bílunum þar. Þaðan göngum við á Tjarnarhnjúk og Hrómundartind, en í bakaleiðinni ætlum við að skoða Tindagil og síðan liggur leið okkar um Ölkelduháls í bílana. Að vanda fer leiðarval eftir snjóalögum og geðslagi fararstjóra þann daginn en þetta gæti verið 17 km hringur og smávegis hækkun.

Laugardaginn 9. apríl göngum við á bæjarfjallið Esjuna

Að þessu sinni ráðumst við á Esjuna norðvestanverða. Frá Eilífsdal verður haldið á brattann upp á Þórnyjartind, þaðan yfir á Tindstaðafjall og Dýjadalshnjúk. Þaðan verður haldið vestur af fjallinu yfir Melahnúk, Lokufjall og Hnefa. Til byggða komum við vestan við Tíðaskarð. Þar mun bíða okkar bíll sem ekur bílstjórum inn að Eilífsdal til að sækja hina bílana. Vegalengd er um það bil 12 km og hækkun nálægt 750 metrum.

Snæfellsnesið þverað 7. maí

Gangan hefst við bæinn Kálfárvelli sunnan á Nesinu. Við tökum stefnuna í norður á Helgrindur sem eru gífurlega spennandi fjall norðan á Snæfellsnesi, ofan við Grundarfjörð. Hæsti tindur Helgrinda heitir Böðvarskála og þangað förum við. Af toppnum er glæsilegt útsýni til allra átta eins og sjá má á myndinni hér til hliðar, ekki síst norður yfir Breiðafjörð og til Barðastrandar-sýslu, þar á meðal Látrabjargs. Eftir að hafa notið útsýnis og ekki síður hins sívinsæla kaffistopps höldum við norður af Helgrindum til byggða. Hópnum



verður síðan skutlað suður yfir þangað sem bílarnir bíða. Vegalengdin er um það bil 12 km en hækkun nálægt 1000 metrum. Það verður enginn svikinn af þessari göngu, því getum við sannarlega lofað.

Spennandi helgarferð í Öræfasveit 11.-12. júní


Hér erum við með val um Þverártindsegg eða Hrútsfjallstinda og fer það eftir veðri hvort fjallið verður fyrir valinu. Þó ekki sé ýkja langt milli þessara fjalla getur verið gjörólíkt veður á þeim. Báðar þessar leiðir standa jafnfætis Hvannadalshnjúk að erfiðleikastigi.



Leiðin á Þverártindsegg er með skemmtilegustu gönguleiðum sem um getur, stutt og brött alpa-leið. Ekið verður inn Kálfafellsdal að uppgöngu-stað. Gengið verður um hjalla og skriður yfir Skrekk, sprunginn skriðjökul, og upp brattar snjóbrekkur þar til komið er á toppinn. Af toppnum er útsýnið óviðjafnanlegt á góðum degi og klárlega erfiðisins virði.

Eftir að komið er upp í snjó þarf að ganga í línu. Leiðin er mjög krefjandi þó hún sé ekki löng í kílómetrum talið, en hækkun er um 1400 m.

Hrútsfjallstindar eru hinn kosturinn þessa helgi og það er einnig krefjandi fjallganga á glæsilega tinda. Leiðin liggur inn á milli Hafrafells og Skaftafellsjökuls og þar upp bratta en gróna brekku. Þegar komið er upp á brún er hryggnum fylgt til norðurs um Sveltiskarð. Þegar við komum upp í snjó þarf að fara í línu og þá tekur við drjúg snjóbrekka þar til við komum á toppinn sem er í 1875 m y.s. Útsýnið af tindunum er glæsilegt yfir öskju Öræfajökuls þar sem Hvannadalshnjúkur og Dyrhamarinn eru næst okkur.



Hvor ferðin sem verður fyrir valinu þurfa þátttakendur að vera með jöklabrodda, ísexi og belti sem hægt er að fá leigt á skrifstofu Útivistar ef þarf.

Á sunnudeginum ætlum við að ganga úr okkur stirðleikann og skoða Múlagljúfur sem er austan Örfajökuls, leiðin liggur upp frá Kvískerjum um skóg og grónar brekkur með gljúfrinu, ca 200 m hækkun. Ljuf ganga um fallett umhverfi með glæsilegu útsýni en átakalítil, enda mikil átök fyrri göngudaginn.

Helgarferð 13.-14. ágúst

Enn og aftur höfum við tvö veðursvæði undir. Ef farið verður norður, þá er planið að ganga á Jökulborg (1421 m) sem er inn af Bægisárdal. Þaðan er frábært útsýni yfir Hörgárdalinn og svo líka í hina áttina yfir Glerárdalinn. Ráðgert er að gangan hefjist við Þverárétt. Þegar á Jökulborgina verður komið liggur leiðin fram á Bægisárhjúk og þaðan til byggða. Göngunni lýkur við Syðri Bægisá. Þetta er rétt um 20 km ganga og hækkun um 1330 m.



Daginn eftir er tilvalið að ganga á Hreppsendasúlur (1052 m) sem eru við Ólafsfjörð. Það er ekki löng ganga en verðlaunar mann með frábæru útsýni.

Ef það viðrar betur sunnar á landinu, þá er Trölladyngja (1459 m) norðan Vatnajökuls á dagskrá. Trölladyngja rís um 700 metra yfir umhverfi sitt, gríðarstór og glæsileg dyngja. Gangan er alllöng en hækkun ákaflega aflíðandi og útsýni glæsilegt með fallegustu fjöll og jökla landsins í næsta nágrenni. Þetta svæði er bæði gróðursnautt og vatnslítið. Svo ráðgerum við að skoða Holuhraun daginn eftir.

Helgarferð 10.-11. september

Þriðja og síðasta helgarferðin verður annaðhvort á Arnarfelli hinu mikla (1137 m) eða Stöng í Berufirði (965 m). Enn og aftur verður betra veður látið ráða hvort fjallið verður fyrir valinu.



Til að komast að Arnarfelli hinu mikla sem er suðaustanvert við Hofsjökul er bæði löng ganga og töluvert vatnasull. Þar sem komið er fram í september er von til að vatn í ám sé farið að minnka. Gert er ráð fyrir að aka í Hrauneyjar á föstudagskvöld og gista þar.

Gönguvegalegd er um 25 km. Hins vegar er hækkunin bara rétt rúmir 500 m, þrátt fyrir að fjallið sé 1137 m hátt.



Stöng í Berufirði er eitt af mörgum fallegum fjöllum í Berufirði. Það er ekki löng ganga á fjallið, en það tekur tíma að komast þar upp vegna þess að fjallið er bratt og seinfarið efst. Á toppnum sem er ekki stór er magnað útsýni yfir hinn ægifagra Berufjörð með Búlands-tind handan fjarðar.

Þar sem það tekur langan tíma að aka austan af landi væri óneitanlega gott að rétta aðeins úr sér og skreppa á eitt lítið fjall á leiðinni heim. Ef veðrið verður gott stoppum við því í Lóninu á heimleiðinni og förum stutta göngu til að liðka okkur eftir Stöngina.

Uppgönguleiðin á Stöng sést ekki á myndinni, hún er hinum megin á fjallinu.

Við höldum aftur á Snæfellsnesið í göngunni 8. október



Snæfellsnes er óþrjótandi uppspretta spennandi gönguleiða og þar eru líka fjöll með óvenjulegum nöfnum. Í októbergöngunni dugar okkur ekki minna en þrjú fjöll. Svo skemmtilega vill til að tvö þeirra heita sama nafni – Rauðakúla. Þriðja fjallið heitir ekki síður skemmtilegu nafni en það er Hreggnasi. Við hefjum gönguna í Hjarðarfellsdal sem liggur samhliða Vatnaleiðinni svonefndu á bak við Seljafell en inn í dalinn liggur jeppavegur. Við höldum fyrst á Rauðakúlu, þá Hreggnasa, síðan á seinni Rauðakúluna og loks til baka niður í Hjarðarfellsdal. Úr þessu verður hinn ágætasta hringleið, um það bil 16 km löng. Fjöllin þrjú eru öll á bilinu 800-900 metra há en þar sem þau liggja inni á hásléttu Nessins verður heildarhækkunin um 1200 metrar.

Skarðsheiðin endilöng 12. nóvember

Á Skarðsheiði eru margar spennandi gönguleiðir. Ein sú áhugaverðasta er að ganga eftir fjallinu endilöngu. Frá Geldingadraga verður haldið á fjallið og hreppamarkalínunni fylgt lengst af. Farið er eftir fjallshryggnum og topparnir þræddir að hæsta tind, Heiðarhorni sem er 1053 m. Heiðarhorn blasir við frá Reykjavík í góðu veðri. Göngunni lýkur við Efra-Skarð í Skarðsdal. Hópnum, eða að minnsta kosti bílstjórum, verður síðan skutlað suður dragann þangað sem bílarnir bíða. Göngutími 8-9 klst. Vegalengdin er um það bil 17-19 km en hækkun nálægt 800 metrum.



Desemberganga?

Þessum tíma árs fylgir oft mikil óvissa, það er spennandi að vita hvort eitthvað gerist eða hvort það gerist ekki neitt. Kannski gerist eitthvað 10. desember – þá förum við alla vega á kreik. Meira verður ekki gefið upp fyrr en 10. desember, ef það verður ferð þá er það alla vega óvissuferð. Það eina sem við getum sagt er að það verður örugglega gaman ☺

Fyrirkomulag ferða

Farið er á einkabílum í ferðirnar. Þátttakendur safnast saman á skrifstofu Útivistar, þar er sameinast í bíla og farþegar taka þátt í eldsneytiskostnaði. Nokkrum dögum fyrir ferð senda fararstjórar út upplýsingar um hana og þátttakendur skrá sig í ferðina á vefsíðu Útivistar. Einnig eru upplýsingar settar inn á facebook-síðu hópsins og þar geta þátttakendur í hópnum haft samskipti sín á milli, auk þess sem þar eru settar inn myndir úr ferðum hópsins.

Skráningargjald í hópinn er 25.000 kr. og síðan greiða þátttakendur mjög hóflegt gjald fyrir hverja ferð, það er 3.800 kr. fyrir dagsferðir og 7.000 kr. fyrir helgarferðir. Innifalið í skráningargjaldi eru kvöldgöngur á miðvikudögum í nágrenni borgarinnar tímabilið janúar-mars, alls 12 göngur. Þá er lagt af stað frá upphafsstað göngu kl. 18 og gengið í 1,5-2 klst.



Stefán

Fararstjórar eru Stefán Þ. Birgisson, Unnur Jónsdóttir og Snorri Guðjónsson. Þau hafa öll mikla reynslu af fjallamennsku, ekki síst erfiðum fjall- og jöklagöngum, og hafa tekið ýmis námskeið varðandi öryggismál og ferðamennsku á fjöllum og jöklum. Project Manager er Kristína Baldursdóttir.



Unnur



Snorri

Þeim sem hafa áhuga á að tryggja sér pláss í hópnum er bent á að skrá sig á vefsíðu Útivistar, smellið á hnappinn **EVEREST** efst á síðunni. Einnig má hafa samband við skrifstofuna í síma 562 1000 eða tölvupósti utivist@utivist.is.

***Þetta er hópur fyrir
vant göngufólk sem
vill taka dálítið á
í krefjandi fjallgöngum***



Kristína

Athugið að fjöldi í hópnum er takmarkaður – tryggið ykkur pláss í tíma !